



三淵集

詩

卷十

~ 16  
2423  
1





和  
2428  
1-18

三淵集卷之一目錄

詩

暮入俗離山路中聞鐘

白馬江懷古

巫山

新决泉入池

嘉水

寒溪瀑

别李尚卿 聖佐

黃鵠歌

三淵集 卷一目錄





君馬黃

天馬行

竇廣國

秋胡

龍江贈金顯甫

克光

島竹寄士興

族姪時傑

別仲氏之洛

嘗夜登西湖亭作海潮歌寄士興

石門

病中略傲選體寄士興昆季

浚谷三章贈韓汝重

埠

昆季

九日會講楓溪

寄隣

北征值雪

上元夜終南獨眺

頃往楊山仲父使之畱宿出次于川上賦詩以

上三首

日歸

過峒隱舊居

萬德寺



石門合掌窟

念行

初至東州敬次家君韻

奉別族兄盛景鶴林使君

龍華感興

華山

三淵新構

敬次曾王考三釜瀑韻

秋寺

和士敬族姪時保

洪海州錦龜挽二首

伊川浴

自三淵穿峽向鷹巖

夕望

病中送李子文之星歸白月

黔山寒食

哭黔山

李子文園亭

秋夜寄大有弟昌業

族會日留宿楓溪



三田碑

哀壯士

新歲歎

哀痛詔

折梅曲

芳樹曲寄士興

孤鶴

露津

玉流洞

春遊松川

妙峰寺滯雨

又賦

失昂歎

明星曲

君子行

隴頭水

瑟歌

走馬曲

燕臺曲

巫峽吟



送成伯圭璣之日本

我辰

出郭三首

新興寺

夕樓

步虛閣

風帆

谷雲九曲圖歌

族會

信宿楓溪將別士敬

和士敬所投六章仍以贈邁六首

寄士興

遠游

夜步

除夕

除夕感懷

西溪小酌

和士興夢遊江樓吟遊僊詞

趙叅議世煥挽三首

國哀二首



李鳳煥造

五律 五百九首

加七律

七律 四百十五首

九十六首



三淵集卷之一

詩

暮入俗離山路中聞鐘

癸丑

不言靈境遠騎馬獨來尋野曠初歸鳥山空半夕陰  
無人問古寺有路入寒林隔水鐘鳴處蒼茫洞益深

白馬江懷古

扶蘇王氣杳秋天白馬江流古寺前花落千年何日

發阜蘭歌曲繞山川

巫山

甲寅

巫山東去意悠悠却望箕城是別愁惟有澄江通一





道春光流入降僊樓

新决泉入池爰有孤鴈在中

噉噉孤棲鴈在池不濡羽池枯安所游哀鳴散其步  
有客集谷口舉鍾水若雨泥濁掘數斗水始入池注  
池中生弱藻池上覆嘉樹朝日旭其輝鴈戲自沿沂  
新水與孤鴈樂哉兩相遇

嘉木 乙卯

近屋皆嘉木開門花亂飛看花成並坐蝴蝶上春衣

寒溪瀑

見山必其峻見水必其瀑危哉寒溪瀑起自萬丈壁

壁高不著水蒼蒼竟一石輕風拂中流霧散飄南北  
餘沫久徘徊颯颯吹楓栢楓栢結陰深不可窺中谷  
西峰日既隱東臺坐不得將以問上源夜爲招提宿

別李尚卿 聖佐

瓜生蒙葛上風至蔓葉傾與爾昏姻故八歲與同堂  
憶我初娶時見爾始扶床今日爾能騎揮馬送我行  
送我亦不邇摻裙及漢陽滔滔彼漢水朝濁暮或清  
人生易會合長路孰屏營惟願慎優游努力慰遠情

黃鵠歌

亭亭青梧樹端坐鳳凰雛俯視烏鵲羣高鳴跂我儔



三淵集  
可憐江都王少女遠嫁胡烏孫馬千羣漢家多名姝  
名姝在後宮細君發江都平生金屏內今日踰門樞  
爺孃閉戶泣兄弟送上車前車連後車齊拂紅氍毹  
青駝顧白馬齊飲黃河流下車問室宮導我入穹廬  
入門求水漿勸我野羊酥烏生野中兒顏色與人殊  
大王年太老髮白坐垂頭屠耆面太麤深目多黃鬚  
徘徊兩廬間惟願別處居

君馬黃

君馬黃行步良勒以青絲奮四方奮四方我馬欲追  
跛哉僵不之南不之北不之東不之西但當在吾郡  
府中冉冉曳衣裳歇馬呼牛墻下桑君馬黃行步良  
行行不歸武溪南思我駑馬泣數行

天馬行

大宛出善馬權奇中國無龍身高纏鬃驥首吐長呼  
善馬喜水草胡人喜馳游紅鞵間青絲金羈錯明珠  
漢使願買此萬金頗有餘金多馬不得貳師更西驅  
一戰度玉關再戰越令居收馬涉黃河頰汗縱橫流  
邛竹折作鞭蒲萄馱千壺東入閭闔門蹀躞飲御溝  
漢宮三十六鬱鬱到雲衢東西種苜蓿花葉過馬頭  
左右起玉臺絃吹奏新謳天子見此馬逝將宴崑丘



猛將見此馬願騎擊匈奴太僕牽玉勒大奴夾鞍趨  
觀者齊揚聲但道此馬殊美彼大宛種今爲天子駒

竇廣國

廣國生五歲賣爲宜陽兒有室在清河東望何纍纍  
有姊西入宮當誰補我衣春秋牽買車南北遠往來  
來歸未休息臘月上高山高高伐山木作炭巖石間  
風來岸崩墮卧岸死百人百人生廣國能復存  
心驚坐念之便自擲我錢開繇視吉凶逢吉數日間  
其吉復何如肉食千戶君投斧下高山西步長安市  
人言漢皇后家趙姓竇氏髫童別家去長大識州里

千門未央宮裁裁雙闕起上書到闕下直說見我姊  
閹吏相顧呵問是誰氏子清河水北流竇家門向水  
娟娟河上竿躍躍雙游鯉雙鯉入深淵釣竿隨魚尾  
生小父母沒貧賤有一姊漢宮亦有后廣國亦有姊  
且速通語言勿復使留連皇后得聞之天子同驚歎  
說有親父子生離遠隔鄉自我入宮後不復聞存亡  
且試見顏色孰知非同形傳教整步輦絡繹嚴具張  
歲鞋被珠襦蒙以九華裳龍盤七寶床移出殿東廂  
東廂對林苑珍木自成行桂樹枝相樛鬱鬱周阿生  
白鹿下羣游孔翠上徊翔徊翔脅左翼九雛齊首鳴



中池芙蓉華一根千葉香交語召廣國廣國入踰踰  
著我弊緼袍步上黃金堂謁者前鋪席奉帚趨中唐  
婕妤排箱簾羅立明月璫皇后垂素手美目騰清光  
舉聲謂廣國少前近我床頭目頗相類且欲聞音聲  
廣國再拜言皇后寧不忘終年伐山木作炭面黎黑  
面黑尚自可身高誠難識貧家春三月養蠶倉庚鳴  
提籠逐姊去上樹伐遠揚枝摧傷我體顛倒棄管筐  
皇后聽未卒悲淚下承眶廣國長跪告言談尚復長  
念昔與姊別西上入紫宮追持繡袂裙屏營空舍中  
悲號願須臾撫摩不自發西隣乞斗米持飯塞我泣

東家掃糝糠雙手沐我髮髡然額上毛披拂兩耳傍  
今已如雲長髭鬚俱蒼蒼昨日伐山木作炭風雪時  
北枝苦風寒南枝或不知相忘以百年相離以千里  
不聞代王姬寧識漢皇后皇后日深居誰告弟生死  
天屬易合并久久會有緣皇后大摧傷流淚承羅巾  
羅巾左右揮淚下何連連嬪嬙梳墮馬齊伏垂雲鬢  
雲鬢顛倒落哽咽聲悲酸皇后拭涕淚重呼廣國言  
纍纍聞汝談不復視汝顏尋念爾生後惻惻常饑寒  
初年父母葬瓦柴覆兩墳明年五歲兒出賣棄他人  
深宮獨來處繞身綺與紈温飽莫揚眉悲思腸肉間



生人則有逢亡者莫報恩先貧適後貴便可同榮身  
哀極樂相樂相見誠爲懽中官發內府雕盤捧金錢  
天子弄黃印綠碧青緇穿揄揚曳麟帶冉冉出宮門  
長安列東第好時起田園田園極膏腴高蓋夾朱軒  
先貴死梁肉晚貴不居尊巍巍章武侯慊慊德高遷  
漢家衆貴戚竇氏宜子孫

秋胡

種桑深園中三年不踰墻蠶眠百餘箔出郊遠採桑  
採桑欲何爲織我絲玄黃秋霜持刀尺遠方寄衣裳  
東家妖冶娘發艷大道傍行不結伴去低首携金筐

携筐垂素手儀態一何盈羅襦從輕風舉體葳蕤香  
適逢車馬客珂蓋爛生光中林馬嘶立下車拂巾纓  
欸欸前致辭綢繆兩相當行人苦獨宿春女苦悲傷  
黃金馱後騎出置見丁寧金多不回眄背立默無聲  
亭亭含怨怨但自折遠揚軒騎空躑躅馳去以相望  
晻晻日西夕下山見牛羊還家故夫在秋胡自有名  
中庭新繫馬道上青絲纏三旬樂琴瑟三歲各異床  
道逢爲新面還家慚且驚新婦謂秋胡恨君兩心腸  
春桑實離離青鳩上桑鳴春游諸女兒絡繹多紅粧  
招挑寧獨妾處處住彷徨念昔初婚別持燭卽幽房



交頭結信誓長命無相忘織羅合歡帶爛然五文章  
千回約同心雙手對結成紹繚以明珠藏在金縷箱  
持帶裂君前與君訣平生開門沂水流中泛雙鴛鴦  
鴛鴦莫成匹願為單鳥翔褰裳墮水死生兩絕情

龍江贈金顯甫

克光

山南有桃樹山北有李樹貴其爭時發何論植異所  
與子各天末相逢西湖路龍江識君家繫車長城下  
長城有別歧馬瘡苦天雨蘆嶺况多石行者側足度  
新交恩亦深贈馬有好步庶無中道蹶期以皓首還

島竹寄士興

族姪時傑

我陟西湖亭日望島上竹島竹遠如篁我欲伐為筵  
松舟旣鼓楫潮大抗不得潮深尚自可潮去泥滑濁  
蒼蒼冲霄竦棄置復可惜寄言好風至惟使聲相屬

別仲氏之洛

兄搦阿爺珎七月鳴鴉下江南弟脂阿母車九月木  
薄到鳩林左右竹叢生交葉布枝自相當高堂  
宜笑復宜舞未覺歡會異我鄉兩月初飽德津魚兄  
何復問門外程如彼白鷓顧妻病欲往路遠且徊翔  
新城古城蘆嶺長阿爺勸早歸阿母惜衣單南州黃  
蘖苦多風蘆嶺北去更天寒夜中持飯半成冰馬上



內手屢抱鞍歲暮此行莫倉卒長路遠近無不艱嗟  
哉漢水屬吳塞玄坤教人愁望洛北門北門雨雪紛  
盈盈兄乎兄乎平慎行

嘗夜登西湖亭潮水與月俱滿島竹沙鴈俱淒  
寒有響心悲遂作海潮歌寄士興

江南竹門臨水開出門夜夜見潮來潮來自路潮  
盈亦以時東山月出漾西浦潮水將月與上下但見  
波搖起沙鴈不分風漂到竹嶼灩灩連海無窮極誰  
能朝暮問來去嗟我來石駐龍渡渡西是向漢江路  
漢江湖入過誰家可憐今夜兩道波潮來不能寄相

望只懸明月畏西斜

石門丙辰

月嶽東南隅連峰驚不休折爲雙石門流水貫其幽  
千巖皆怪石春至翠靄浮邪逕人上慄下窺竹脩脩  
行行少復前乃造窟下廬其人形槁木其地風肅如  
鳥獸竟難託何以永夷猶再掬甘泉去僧言壽千秋

病中略傲選體寄士興昆季

我病連旬月昏墊卧終南掩關從草滋塞牖畏風侵  
卧坐惟一室壁積繞枕衾高粱聞乳燕屬耳卽新音  
冥卧苦無悰徂節邈難尋木蓮委素萼山棠耀高林



樽酒逐芳物為樂苦未湛奈何抱幽蘊庭砌易改陰  
喜楚徵索居聞濤佇沃心親友曠惠綏寧復簡所欽  
興文貽篤愛擲筆吐幽吟

浚谷三章贈韓汝重埠昆季

有浚者谷曰左華嶽叔兮伯兮下上其宅灌彼長淵  
不亦西東淵名伊何維龜維龍龍之潛矣載戢其鱗  
君子以之遵養厥身  
維東理田則百其畝維北築室不盈十堵乃攘乃剔  
乃瞻原隰松栢啓矣其下維宅慶既安宅厥游維寬  
酌彼洋洋式祈永年

泉有游魚侯鱖侯鰕子有湛樂侯琴侯書載考載歌  
宜爾弟兄兄弟洽矣爰及友生速以酒食或携在林  
匪則游敖以永德音

九日會講楓溪

秋節人所悲九日為嘉時出門步道遙招我由三池  
我冠曳長帶同聲諷書詩俯視高堂南溪水下流離  
誰謂秋無花叢菊發歲蕤酌我朋樽酒願以置路歧  
青青君子衿豈敢憚山陂春蘭與秋菊來會每如期

寄隣

隱几終南下好人為我隣卜隣不卜宅古人亦有言



三淵集  
裴糧游四海傾蓋良獨難况我棟宇接情好日以新  
晤歌爲德音樂甚吹篪壙冲情相投分寧論髮齒間  
如彼江湖魚相忘以究年

北征值雪

冬雨息滂沱作雪來蔽天同雲自錦山霰集皓中田  
羣鴻悲野宿齊叫以遠遷宜我遠征人重裘莫禦寒  
寒甚能自進所憂馬僵顛僕夫告手凍往往落馬鞭  
風霰赴懷袖南首眄朗山朗山不可見流淚下沈瀾

上元夜終南獨眺

丁巳

終南松樹月迢遙下照長安通九霄今夜少年金鳳

曲誰人先踏錦川橋

頃往楊山仲父使之畱宿出次于川上亦有溪  
叟隨至有漁者有鷹者設酒以觀旣夕乃罷賦  
詩以上 戊午

鬱彼川柳下潛其魚川之注南魚或北遊谷風旣連  
陽日其舒亂其清止下上施眾收之有物言屬我厨

其二

鬱彼川柳有貫其鱗斑斑黃白濯濯其鮮升之釜錡  
湘用彼川祈祈野老維以佐酒歡言登席獻我仲父

其三



仲父曰醉小子其屬我顏既熏我馬攸繫山有芽蕨  
花有未萼衆言其夙我曰孔時思樂迨暇實不易哉

曰歸

曰歸復曰歸有宅在永平嶮巖彼居世阪田可爲耕  
朱門無安枕其憂在高明念我遠流竄氣結悲南方  
菰蘆鬱蒼蒼梓榆道脩長鱗魴離九罟鴻鴈集枯桑  
梁稻峙中廬我親安所嘗廣覽陰陽馳變化不故常  
南風將夏發草木春已昌長當一來歸呼咷復誰忙

過峒隱舊居

赫赫山上火母近谷中栢所謂者好人居此致獨樂

深淵有潛魚中林遊麋鹿聞昔青雲友招招拖羽翮  
飲水挹其濁寧復縻高爵逍遙川上觀多獲我心欲  
慕君善窈窕百歲斯躑躅人苟崇令德高朗豈終極

萬德寺

松湖廻出石門橋驅馬悠悠傍海遙暮雨上尋靈鷲  
寺高樓南受合肥潮牕連梧竹浮蒼翠鐘合波濤撼  
閨寥今夜定應高處宿細看雲物漲晨朝

石門合掌窟

青霞淑氣日南浮浴海歎天鬱未收卓犖玉成千嶂  
峻灑熒珠迸細泉流石橋宛入天台度冬栢疑攀桂



樹留向夕步從雲際降回看半似夢中遊

念行

議政公自靈巖內移

朝采山上杞悠悠憂我父道路千餘里山川阻何許  
遠望浮雲間無乃困陰雨軒車在中達方舟遺錦浦  
飛鸛鳴不息鴻鴈遵洲渚綿綿懷我勞安敢入室處  
獨有東山詩三嘆起延佇

初至東州敬次家君韻

昨傍魚龍國今將木石居窮陰寶蓋麓遺堞秦封墟  
夕雪天幽晦邊雲野莽虛羈懷集進暮舒憤賴詩書

奉別族兄

盛景

鶴林使君

歎谷太守善鼓琴郡中鼓琴不下堂過我東州飲酒

醉高軒論琴白雪雱愛兄三十金吾子白皙駿馬遊

帝里紫綬東臨問何樂上嶺冰雪何艱哉梧桐作琴

五馬載言欲奏之侍中臺臺下澹澹海波揚扶桑照

檻日出光丹書縹緲永郎湖聽琴徘徊四僊徒昔聞

蓬萊移形素歸來爲我彈出水僊操

問何樂一作亦勞哉何艱哉一

作何崔嵬

龍華感興已未

春風東方來吹我龍華山雲霞興千嶂遠望何斑斑  
我入自谷口花發青溪間青溪向我來飲馬聊盤桓



春興詎不屬獨吟成流歎去去含孤意終當悵悵還  
誠不及林鹿援戲相拘攀

華山

華山阻四方回回百千成人來未有路左顧瀑布行  
行行桑土出中有數廛氓試往扣柴荆雞犬爲我驚  
向我指青山斬木火其耕黃梁獨有年谷飲泉水清  
登山採蕨薇當歸山芥青中言我心樂巖樓一朝營  
相隣何所談葛天與大庭

三淵新構

雞犬人煙瀑布東白茅爲屋據穹崇千巖映發秋冬

際一逕盤紆雲霧中削玉蓮花峰秀出彈琴鬼谷水  
回通此中洗藥兼風珮未必僊居讓葛翁

敬次曾王考三釜瀑韻

新構茅茨處秦餘古有村桃花迷甲子瀑布界乾坤  
積石遊人斷繁雲老木存悠悠我先祖曾一溯真源

秋寺

古寺多風風入衣寺南寺北葉飛飛舉頭山氣雲霞  
罷側耳禪音鐘鼓稀僧引清溪前砌過虎乘新月後  
林歸莫言窮谷彌蕭索終覺端居可息機

和士敬

族姪時保



三浦集  
東北有穹谷窈窕不可測重峰叅白雲青溪百餘尺  
中有彈琴人女蘿爲被服躑躅涼風至靈波日漣漪  
思爲雙潛龍千歲不相離

洪海州

錫龜挽庚申

我有一束芻公實美如玉裁裁丈人行愷悌君子德  
游戲六藝林蔚然游夏學精意妙入神圭臬丹青博  
堂挂石鼓文几積華山璞琅琅禮樂器聊以澹留客  
博文豈獨偏雅操不溫蠖歸哉漢濱卧華纓清斯濯  
不問城郭內萬事有回薄寂寞太玄經千秋空故宅

其二

目極望江南江南春可傷念昔長城郡杏花春飛揚  
掣彼閣下鈴始拜公之床瑣尾流離子殺蒂嘉樹傍  
高館授我餐薄言勸壺觴憐我車軸折送馬有驕驪  
高義不可諉尚爾中心藏逝者非舊春四載爲千霜  
流斯江漢水素幔水中央泉路在汎汎新阡去日長  
興文泣已酒嗚呼不成章

伊川浴

近宗居驢山者  
有沐浴之行

步出豐田驛皆望馳山君馳山君顏如丹令馳車騎  
一何軒軒太醫提藥囊出入車後前公子北行去有  
病浴伊川伊川出神泉蔚蔚光澤鮮上湯浴公子下



湯浴少年少年羽林郎窈窕其數千關弓皆破的將  
射上林西苑鹿上林鹿未可蹤敦化擊鼓暮瞳朦

自三淵穿峽向鷹巖

秋晚行幽峽心閒興有延石泉人面洒林果馬頭懸  
暫失藤蘿路頻逢黍粟田聞雞時攬轡蒙密見孤煙

夕望

曖曖墟中望前溪忽後峰煙霞氣色滿梁黍與情濃  
雀噪投田樹牛來度壑松衡柴從此掩吟嘯且從容

病中送李子文

之星歸白月辛酉

北園采艾艾葉長賒酒欲喚病在床昨夕天晦聞兒

言白雪飛絮漫池塘終南嶽麓皎寒色不見終日映  
我傍幽蘭澗道雪應深白月歸人倚陰岡

黔山寒食

松風滋雨我心傷那忍春原細草芳母氏高堂今伏  
枕哭君歸去淚偏長

哭黔山

再哭黔陽春終疑若人去一往苟不返三年便千古  
纍纍母將子春草生同土暝息依松栢微月一何苦  
嬋媛存營魄眊眊忽無覩每歸若相棄胡寧不延佇  
上馬淚如綆黔山正飛雨



李子文園亭

嘉卜不出闈重基特穹崇維北負研砢眷四挹青蔥  
列墉既壁削方沼聿鑑空庭砌汎遂淨果卉匝以重  
撝茲無爲業習成靜者功奧曠孰偏廢華館復園中  
崇檐棲弱雲疏牖納善風流矚豈停目散跬不輟筇  
巖鏡契滋蘭谷籟寤聆松景古亮有會引調詎無同  
試推忘適術用晦大隱蹤

秋夜寄大有

弟昌業

洞裏彈琴溪水流松風吹入水西樓明明有月同良  
夜猶自中林阻樂游

族會日畱宿楓溪

長筵設豐膳呈齊顏等色合懽情將進酒酌兕觥諸  
父昆弟以次行飲言酣杯未停日旣西藏月未生高  
弁轉紛若星雲散下山退紅亭醉者歸畱者醒池塘  
觀榭水清泠明燈出光燭堂皎如白日重舒光坐須  
史玄顏發千歲爲懽遽何央

三田碑

朝出廣陵津西睨三田碑石闕抗崑崙上有刻龍螭  
炳煥曜朝日丹青一何奇借問何年代誰爲建植斯  
嗚呼所可道涕出復何爲默默顧南漢烈風吹我衣



立馬竦長劔凌厲心摧悲中原方遘患飈塵縱橫飛  
多謝一扁石安可萬世期

哀壯士

張後良

立矛萬人悲伐鼓露梁津蓼蓼鼓音入城闕中軍在  
殺如虎人山有藜藿亦有虎水有蛟龍尚可禦但得  
長刀奮如湍從汝錦帆交中浦嗚呼未擊胡壯士郭  
南死空畱可憐流血處白沙回風露梁水

新歲歎

壬戌

四時行成有名節舊俗最愛三元日可憐送舊迎新  
樂出門行遊三日畢家家椒酒酒千壺牛炙羊烹爆

竹俱老者斑白耐屠蘇少年意氣覓呼盧都人士女  
途中賀是日顏色兩敷腴青樓鼓瑟錦川橋朱帕踢  
鞠鐘樓衢拜闕千班去如流火城平明散宮烏別有  
街東沁園宅後堂置酒飲貴客貴客朱輪寶馬駐黃  
金爲門畫關羽城中效之門畫新却令遊者左右顧  
薄暮來歸裨成帷狹邪相撞醉者遇嗚呼是事在兒  
時 顯宗初年我所知自經辛亥鬼車出只今齊民  
但憂飢冬旱無雪大麥死騎馬三日少游子慊慊筭  
緡急生理已聞日中爭開市

哀痛詔



三淵集  
甲寅以來豐歲少彼蒼回斡人得料萬民喁喁衆魚  
急布路狂走或悲嘯聖人罪已不罪歲昨者又下哀  
痛詔心非木石見者悲讀之未半涕漣而我 王豈  
非萬世聖喪亂未見十年定羌夷接軫謂今日東飛  
梟子西走獍只今沴氣鬱參錯或云因此致蝥賊山  
河千里八蜡閉大庖不盈天馬瘠况乃 東朝萬歲  
杯法酒寂寞聖語哀極知損上是上策每對羣臣勸  
減裁正殿論賑玉食寒白日移景通天臺又聞秉燭  
讀姚姒達曙西銘誦幾回天高不邈大聲呼民暑寧  
拒赤心敷大老東來野無人猶自丘園走蒲輪轉災

傾否望公輩一言興邦我 王在君不見昨夜東風  
退雪霜弱草蕩柳滿漢陽青丘月表問幾尺老農延  
頸梅雨祥歸哉小民且按堵含哺今秋萬斯箱

折梅曲

江南嶺外多翠樓樓上女兒北望愁遙念蕩子早行  
苦恒抱空床夜眠羞夜悲朝思易驚年小苑新梅已  
可憐可憐梅花繚亂時驛使飛鴻靜春天三分菸萋  
畱枝上屢度攀援置牕前愁隨皚雪合消鑠恐將明  
月闔嬋娟明月嬋娟暫同色那能畱遲艷陽年願得  
晨風九萬里持寄懷袖所懼子黃沙積裏尋豈見媽



氏山下採誰似徒言羌笛馬上吹春在江南君不知

芳樹曲寄士興

芳樹上春日迢迢映海門自君愛梅建芳馨茅山喚  
作梅回村笑聞南隣夜移去小艇風雪戛極浦移入  
幽軒窈窕處煖酒銅鑪鸚鵡舞我在此間問芳樹季  
子來後花無數無數奇花正旖旎可憐透簾復燭戶  
凌寒未讓桂驚時早勝柳君不見淵明把酒黃菊叢  
子猷招風翠篁中往者二賢興不低只今桃李但成  
蹊霜華霜質辨者寡楸幃艾戶竟天下君曰愛梅何  
爲者

孤鶴

古道無冰石無數綠蘿裊地春風舉赤松王喬上太  
華伏枕細思雲興處東南孤鶴西北顧翔下庭中不  
歸去

露津

寒食香火我出郭露梁津上長風色飄飄不斷海門  
遠燕尾楊花黯且黑鴉鷓鴣亂叫人撼撼楊舟在  
險津淚酒中流去年心宿莽青青漢陰春

玉流洞

自我逢春未出遊及今春歸但懷愁新第閉門洞陰



薄麗日悠悠松林幽城中桃李落誰家望帝閒花映  
玉流此時兄弟寂寞同有酒不坐看花樓

春遊松川

歸馬日欲西自此步松川川回石崖斷瀑布忽已懸  
飛流向日落遠望皜皜然金潭寫青天素沫紛回旋  
傍有山杏花婀娜長松前羣影久相蕩與之媚清漣  
却顧同遊者無不似真僊

妙峰寺滯雨

道峰有好期東西共陰雨溶溶階下雲霏霏上承宇  
須臾青蓮界氣色滿牕戶幽尋阻雲蘿孤興滯芳杜

開軒久東望翳翳遂過午披簑舞雪間無乃待我苦  
徘徊兩不知一夕如千古

又賦

夜雨連禪梵溟濛霧色齊誠知山吐旭復村水增溪  
寺鴿青毛濕天花絳萼低東踰未可討開戶眇雲梯

失鼎歎

急風磔磔衆虹匿春天霏霽月無色慶殿古垣夜向  
深西林老友來相卽呼燈相延慰菜色問子朝飢夕  
不食答云家貧徒一鼎見失前夜風雨黑尋之不得  
仰天笑向來饘粥舉火少鼎乎鼎乎焉汝用塵鉉苔



三淵集  
足長相送原生故自耐  
顧領子桑猶不廢嘯詠  
坐中士敬與德以且爲  
善謔休惆悵貴不必五  
鼎養貧不必牛衣傷人  
生有涯可奈何楚弓塞  
馬兩茫茫君不見九牧  
收金禹作鼎泗水驚波  
鼎亦亡

明星曲

明星出漢北夜夜光如  
一龍辰正磊落萬里見  
行列玄雲絕北斗赤月  
跂西畢牽牛不可農織  
女望愁絕君王拜廟歸  
淚下明星出星稀鳩鵲  
曙赭赭東南日

君子行

君子不出位敦仁在安  
土梓人不代斲祝人不  
踰俎

園桃苟無實不如播嘉  
黍華言盈庭戶於道亦  
何補不見漢西京反素  
務朴魯張公論嗇夫太  
史嘆其語

隴頭水

隴水聲哀哀劇於悲鳴  
猿由來下秦川流我故  
壘間軍行聞此水健兒  
不能言磨刀隴中石失  
馬隴上雲吞聲起夜去  
忍渴行泉源男兒早負  
韉寧歲三從軍東征屯  
上谷直北出鴈門頭白  
自今夜淚出腸與肝

瑟歌

挾瑟霸陵上使妾望故  
鄉君有四海樂妾有短  
衣裳絃歌相向起誰爲  
愴中腸新豐道何闊直  
哉邯鄲路



三淵集  
北山自有石未及南山固同君萬歲後滴滴去安駐  
我欲竟此曲此曲悲日暮

走馬曲

弱柳青青絲春月章臺垂張公朝出上馬時誰其愛  
者市中兒他家馬煩不能驕君馬何能如電馳馳過  
楊柳下堪言如龍飛情憐白雪毛眼偷黃金羈楊花  
風亂相逐去急應登樓論畫眉

燕臺曲

君有欲報仇我有欲報恩與君飲酒華陽臺黃金爲  
砌碧玉軒麒麟錦席重玳筵金盤豹胎炙熊踏蹠熊  
蹠膾鯉魚執君杯將何言東胡駿馬身是龍北方佳  
人歌入雲歌鐘鏗嘈飲健兒千載爲樂白日馳下臺  
西往易水駛君謂荆卿死爲誰

巫峽吟

古稱巫山高巫山兼三峽行舟上巫峽使儂損紅頰  
生長江陵未嫁君巫峽漁歌屢已聞巫峽下爲朝宗  
水長波清瀉竹箭奔連峰糾紛攢蜀天竹樹構慘逗  
楚雲千里日曦少兩岸石貌分瞿塘西望灩澦浮五  
月難行復清秋霜天九月吟夜猿三聲流淚雨中流  
從君舟如馬遮莫過黃牛君誇白帝賣錦好妾論江



三淵集  
陵養蠶早明珠寶繭脫纖手令君日醉宜城酒象床  
瑤席翠羽珍南塘雙鯉發我笥維君桂棹楊柳東緩  
聲菱歌遣秋風

送成伯圭琬之日本

成子好讀書讀書自妙年十五南華經二十至大篇  
浮浮芥爲舟汎汎五石瓠臨書再三歎俛仰撫八區  
心中東海樂夢中大鮫魚鮫魚在枕上忽覺望海水  
仍更試下筆溟漲闊涯涘中年水僊臺濯髮向窮石  
酣歌間水操自名爲海客伊優引高蹈振翅戲京洛  
洛中風流士觀子騁文墨中堂置樽酒牋繒連闊幅

初筵勸羽爵樂飲過二卮敷腴面欲紅輒已揚其眉  
連呼百千字汨汨如流注如彼噴唾者雜下珠與霧  
如彼大冶者金鐵一爐鑄隨語自成韻隨韻自成調  
一日掃百篇眴眴故嫌少腐毫揚馬徒哈爾徒勞苦  
七步亦太遲八义安足數小兒車五山大兒李奎報  
問君何能爾靈蛇自盈把的皜滄海珠無非夜光者  
倏然騰豐價名聞大司馬偉哉藝林匠一代攬魁柄  
召見乃大悅嗟歎日域詠朝家通日域遣使一葦杭  
其國日出處其俗喜文章伐木必秀翹選材必其良  
司馬謂成子惟子爲行人登時詣九重伏檻前自陳



三淵集  
云有成氏子雄鷲世無雙才高又神速足以華我邦  
爲人潔白晷良合使南夷 上曰得其人便可速遣  
之金錢與雜綵九府許齎持裁縫造錦衣絡繹裝爲  
行行行將復行但自東南征東南大瀛海赤日從中  
起是注八紘水是通銀河水是爲無底谷不知幾萬  
里青絲爲君竿白鵠爲君船琴瑟爲君載羽旗爲君  
翻東皇爲君導川后爲君先何以駕波浪颶風御君  
行何以定東西北斗爲君衡中流上水牕承浪騰龍  
螭長鯨奮其脊鬚若蒼松枝離襪分巨細進退雄與  
雌恢奇復譎怪宿昔夢見之心中東海樂壯觀今乃

爲男兒可憐蟲足不踰邦畿生平適我願此事詎非  
奇弭棹卧老館始得接卉衣候風更復進喝流望壹  
歧磊磊向曙星七島竦而羅須臾失大洋浩漭入于  
河颿櫂與潮上實維果布湊兩岸信美美高下被文  
綉當樓小垂手紅粉翳羅袖枇杷自映竹碧櫺重櫺  
柚物物多珍異事事誇豐富仰頭左右望錦纜爲回  
還前未至江戶斜眄皇都間長城度大板清伊弄如  
環箱根抗巨嶺自此登羊腸神瀆溢爲湖無乃帝臺  
漿三朝望高頂踰越路何長葦原六十州關白自言  
尊烜赫盛意氣借問其姓源雄都日光鎮奇麗殊赤



三淵集  
縣崇墉積萬雉九橋虹霓轉閭閻驚畫裏板屋稠如  
毛居人賤黃金遊者貴寶刀寶刀輓轡名犀渠各在  
腰傳有朝鮮使車蓋遠如雲關白自上樓五層御櫺  
軒朝鮮文章子指點以望君長揖上金堂抗禮向殿  
陳蘭房闕邃宇金繡重玳筵髹盤無上味橙橘吐芳  
芬飛肉奏鞞樂嘈嘈一何喧穆穆賓主顏行酒榴花  
樽樽前作使者如花三千面三千素手中皆持孔雀  
扇秦娥乘鸞畫班姬明月規盈盈向君前皆願得君  
詩君詩故自好易就復難遲三千手中扇一寫不移  
時關白大驚歎舌舉以爲神朝鮮文章子果然非常

人金帛手自奉寶硯玉蟾蜍紹繚大秦珠璀璨青珊  
瑚雜然頗羅列棄去如塵沙鄙哉陸生橐奇哉博望  
槎扶桑問要領經歷詢遺俗飄梅北野廟垂柳晁卿  
宅豐聰勝鬣經花雨暗天落希有資博奧土風該商  
確臨當欲還歸上謁徐福祠茫茫海風波愁殺秦帝  
時君行萬里外一朝見三山三山竟何如葉葉紫煙  
間金銀晝日流霜虜夏月寒遙望但皜皜飛來衆白  
鷗紛紛雪色鹿騎之多神僊長耳白箸翁不壽乃千  
年靈芝自有萬不減綏山桃辛勤善採來一舉越雲  
濤無若彼徐福獨爲島中豪



三淵集  
我辰

我辰安在在今日今日斯何七月五涼風入樓雲欲  
素仰首萬里見天宇懸弧太平今三十曷不控揣以  
歌舞客至酒薄肴核少綠瓜紅子散如雨今年學琴  
忘髮素與君相向一再鼓

出郭

衆雞下我庭初鳥翻遙樹我駕動此時不憚彌天霧  
冥往莫我知高興默有注悄悄大寺街市聲不載路  
駑馬謝黃棘流邁忽如雨送身出埃壒如假肅肅羽

其二

朝日夫如何半景蒸玄顏東南銜川原西北閃林巒  
羣態倏未定瀾漫更我觀撫馬露草中載笑瞻華山  
空青唯古色秀氣若在鞍霽目入無倪遐意溢未攀  
飄飄頭上雲百憂寄其間

其三

奕奕心內憂終歲未云絕勃磳守一室無幾髮如雪  
蕭辰奮逸駕庶往瀉忡懅無何背城闈倏忽度嵒嶽  
岑嶠備幽竇湍瀨足清冽冷風假余善逸雲任爾洩  
豐豐遇可淹造適誠一啞匪直神不勝亦由境有別  
靜然援巖蔦賞心昏如結



新興寺  
雄構宜崇基人天著律光窈窕地靈謐交互峰勢迭  
布金園已廣散花塔欲列峻樓敞南向誠以延明月  
三五矧伊夜我興斯超忽興言溯微白桂華逗幽樾  
餘清赴懸鐘極明抵數髮亭亭羣寂內素瀨鳴不歇  
高詠返冥默單坐遂如兀

夕樓

僧汲石流泉吾以漱吾齒漱齒取斯潔濯心詎無以  
所累非諸有太冲乃在己高樓了然久山暝意何似  
玄蟬去松杪相繼暮鐘起歸尋櫻後寧林籟不盈耳

步虛閣

咽咽待霜蟬撼撼感風林縹馬余有歌抵節歌古今  
步虛峩閣昔雲起激楚行樂未盡心綠蘿綺樹翠幕  
風瀑流瀉入金壘中濯金壘笑相向五陵豪客邯鄲  
女日晚下山殷清吹寶馬香車竟一去萬古消歇北  
邙對二地咨嗟駱山在汲井徒爲少年賢駕龍誰其  
八公僊八公桂樹老遂死塹垣飄瓦落松子秋草復  
春色相送斷腸水

風帆

快帆須長風帆高風在中西流之水東驚風峩峩百



三淵集  
幅翻向東前帆及後帆齊上斗津者嗟哉大難每愁  
人朝雨不見石如馬船頭各各見五兩夜泊驪江孰  
下上

谷雲九曲圖歌

東方畫者國能死嗚呼無人畫山水曹生學華體做  
畫得形似古來成虧取一長是如江淹擬蘇李試看  
谷雲九曲圖我怪彷彿能如此伯父泉石痼嗜畫亦  
復爾曹生初自西來時聲價藉甚喧京師千家屏障  
風雨集伯父奪取山中歸白雲嶺高竦華嶽坐來盤  
石赤足垂松風解衣急呼酒把毫四顧來清輝傍花

溪頭始下工泝到疊石臺下窮攢感高深豈一勢采  
色不定九回重春萼秋楓點綴殊雲興霞蔚霜濃濃  
削玉青峽神女迴雪雲飛沫何其雄明月溪隆義淵  
玉瀨更復幽棲東卧龍無恙積水曲牽牛宛在衙門  
中遶屋喬林株可數綠蘿垂裊森森松桃源父老雞  
犬近武夷先生舍宇同亭高政與華嶽對橋小是向  
雲嶺通雲嶺蒼蒼望之盱伯父今在負郭居隱几終  
日兀送神二年屢作籠水夢可憐新障好見隨向來  
遣畫此爲用宗炳老矣足卧游耐可彈琴衆山動輒  
川見畫去沉痾我聞其言謂之過曹生此圖不蕭條



三淵集  
谷雲漸近城市遙乃知繪事未可廢曹生亦可稱善  
描

族會

良會選秋日采菊斯澗濱羣來無大小各言展情親  
連翩休古亭徐步躡清塵華筵秩鱗次綺饌紛星陳  
樂飲用大斗斟酌見天真請說瀨下水源波自相因  
持以喻同席誰復爲他人遠之則行路近之則一身  
常願保茲善歡笑歲以新

信宿楓溪將別士敬

下山在城闕頽頽懷百憂故人幸不歸嗣我西山遊

清庭絕塵滓華棖竦我樓蘭房多珍觀床簟使人留  
良時休宴飲信宿委枕稠談讌寄夜永燈火熇中丘  
黃花何寂寞蒼檜晚脩脩回風赴三池聆彼清激流  
覽物方蕭索寤寐起別愁

和士敬所投六章仍以贈邁

之子告誠歸乃在孟冬天繁霜紛無垠北風鬱回旋  
行役亮非時離別信亦然朱顏誠芳辰緩帶在盛年  
有往苟不淹誰禁情愴焉秋鴻翔遠陸冬魚歸舊川  
和樂嗟在彼齊榜島中船

其二



三淵集  
鼓琴亦有緒原田亦播耕奈何華屋處旅葵生中庭  
苦心有之子存古奮奇情悲音激斧斨壯規綴軒楹  
新營煥若神故物依平生無污我泉池我池日清泠  
無折我樹楓我楓森菁菁

其三

良會不出門同人在中丘綺筵依崇岡金壘薄清流  
變色御肴饌殊等通獻酬嘉時適已邁勝寄一何稠  
前臨古亭存仰觀翠屏幽君來逮爲樂欣慶在春秋  
終宴未云斲後夜申綢繆

其四

陶陶蘭蕙月莫忘蕩遊時嶽嶽道峰山水清石離離  
提手嘆奇麗濯纓振戲嬉明燈止佛宇豪竹與清詩  
歸來若俯仰寒暑屢推移人生富別日勝事誰長持  
回首東郊道與子悵依依

其五

鷓鴣飛南海不顧鳶與鴟鼯鼠穴神丘不爲衆所窺  
君子以此觀與世安是非和光道不煩默默復奚爲  
門機一爲闔駟馬馳不追親交今在別忠勛豈捨茲  
去去莫復嘆江湖不振衣

其六



自君爲西蹈巷中無居人豈無悠悠者鮮我平生親  
相望室是遠溟瀛不可隣翩翩時惠來投分慰我身  
談讌叙商參相命爲嘉賓高亭臨廣路殊軌起飈塵  
安得驂與服齊首共車輪

寄士興

仰鴈莫彈棋求魚莫捨筌窮深在致志不積道豈宜  
惟昔董春秋下帷聿三年寥寥揚子雲皓首卒太玄  
沈潛踔高明志士誰不然振振我嘉友遵海邈以綿  
濡翰互相望嘆息未比焉明珠苟可索莫憚九重淵  
詎聞珊瑚樹生在野中田

遠遊

明月照千里白鶴東向鳴清聲順風至引我遠遊情  
遠遊欲安之登舉出九紘朝馳太華山夕息衆香城  
東皇與四僊夙昔勸當生忘言存谷神服食兼黃精  
受訣逾十載歲暮未合并玄冰結玉樹素雪漂瓊英  
天津路窮絕雲漢何逕庭訾黃苟不下岱宗安可征  
恐懼失所欲延首淚沾纓

夜步

深夜定寢畢步自北堂歸應門寂已出高月照我衣  
晶晶阡陌上曠矣行人稀良驢斲南廂守犬吠東扉



三淵集  
獨吟迨未睡兒女莫我知夜色孰商確鐘漏方微微

除夕

析薪在我庭薰竹徹遠天嘉友赴今夕秉燭酒如川  
童弁以次進嘯唱起四筵人生信忼慨同聲嘆逝年  
撫往鮮能驕誰爲高枕眠滔滔求榮名歲落亦已然

除夕感懷

今夕何短易矐矐西樓少弟爲新婚瓊弁象珥秉高  
燭昨者方是竹馬奔人生衰盛咄見逼倏忽相踰去  
如雲歸入新齋急喚君九街鐘動對椒樽

西溪小酌

癸亥

人生老抱子百憂漫無涯出門每相失進退東湖期  
日暮偶然來清樽靜在茲秋來一會闕秋去百卉腓  
黃花委池館寒月在軒帷北風攪天籟松嶺無定枝  
齊心萬世上蕩漾終安之抗言論古史歷歷興與衰  
舍旃莫談今浮世信多歧

和士興夢遊江樓吟遊僊詞

往者西林結君初古文龍虎手中書共道高天未蒼  
蒼不然采芝崑山隅浮家一往君不歸髮短心長兩  
何如寒濤浩淼且空闊遙夜茅島枕席虛飄飄吾已  
往來焉夢中各自稱水僊詎知天飛復淵沒惆悵玄



感使之然赤虬黃鶴今何處漢南危樓白雪天

趙叅議 世煥 挽

蘧廬寄玄宙古今若遞易濛濛風中塵誰非暫時客  
理悼有太甚情慟兼酸惻高明嶽山麓掩曖幽蘭谷  
一出爲遊魂平居遂滴滴飛旒映冰雪家人野中哭

其二

嘉樹生平臯蔭者忘炎涼孰知是勁幹終復凌風霜  
趙公高直意舍舍形骸裏耦俗乃其迹和光有妙理  
在古我延頸何況依仁里大真卽焉在厖貌日耳耳  
赴闕欵段馬驚歎里中子一朝巷無人牢落淚如水

其三

逝者陽春月公來造我軒長嘯入不言高天晚鴉翻  
奇孫來在抱妙吟馥春蓀善謔倚此騰嘻嘻至日昏  
此事爲疇昔松聲起古垣

國哀

昨夜人出二更來欲眠叫聲聞 國哀竟是 王母  
厭世矣蒼天蒼天我安恃燈明相蹴起相看面面無  
言淚泑泑吾 王罔極可奈何長夜風悲 聖體寒

其二

甲寅天崩今地拆百姓何至此無祿兩日大臨哭聲



起叫自閭闔響山谷王難古梁冰水白過眼 崇陵  
涕淚落嗚呼奇劔為十年瞻彼松栢萬哀積

三淵集卷之一

三淵集卷之二目錄

詩

雪夜愴懷

朝哭

感懷

哭弟 昌立 八哀八首

出郭

北斗川望江

栗寺悵返

山上有小屋與村邈絕問是士人所棲



夕望愴懷

哭返

大麥行

登尹氏亭

與士敬聯枕話別

寄士興 三首

三月三日

春夕愴懷

過佛巖有感

紅杏吟示夜會諸子

送俞仲强 命健 昆季之清風 二首

傷二毛

豫章行

猛虎行

黃雀行

堂上行

杜鵑行

短歌行 三首

燈夕感吟

耳聾



仲氏以 王命往謁尤齋憑有私乞臨行杼哀  
以贈

黔山端午愴懷

送南相九萬赴燕五首

一絲亭

題洪生世泰日本所得獨釣寒江雪圖

出郭

哭亡弟墓

屈雲村

曉霧

昭陽亭

西泉月夕

僊洞

出山

遇風

五歲童子遺基

伴睡菴

暮入龍華

石泉寺

石泉寺感懷二首



靈泉

遇雨

月夜

白菊

石泉寺待月 二首

下山

別士敬兼寄士興

洛誦樓小飲答士敬 四首

楓溪朝起

楓溪遇雪 四首

衆妙軒

與洪世泰聯枕

喜洪世泰來宿與李瑞卿 奎明 對酒同賦

病夜悼懷

雪後

清城府院君 金公錫胄 挽 三首

伐冰歌

除日道感

寒食七思 七首

東谷尋瀑兼尋花信



石泉寺夜雨 二首

雨後望瀑 奇 三首

連有淫雨坐念瓦壞慨然興歎

二子觀瀑悵莫之從

十二日崔李與姜出遊寺南潭曲余未之偕望

于樓上聊飛一詠 三首

西臺遺興

春夜 三首

煮杜花 二首

漁獵未獲

自石泉還龍華流憇九疊屏上 二首

望金剛山

入長安寺

過鳴淵

望高臺

新羅太子遺城

楊蓬萊大字

金剛臺

普德窟

摩訶衍



三游集  
九龍淵九首

九龍淵歌

百塔洞

登衆香城

伽葉窟

須彌臺

蓬萊歌

雨中靜意示敬明弟昌緝要和

待俞君四命岳

放舟

漢湖少泊

驟雨

七夕

乞巧夜與洪世泰會于妙軒當月畱話余適以  
故徑歸聊抒一悵

北山歌

十四夜平臯獨立忽逢俞君四步月而歸

洪世泰來過

感興三首

贈智霑上人



白馬篇

詠金明國山水圖

贈尹體元以健之任珍山

三淵集卷之二

詩

雪夜愴懷甲子

玉衡貞孟既天道斯在東明陽征以漸涸陰滯未融  
素雪淹兩夕濛濛彌層穹散漫既停畱千里皚已同  
夕飈振纖檜宵月映脩桐皎然出徘徊愴怳切房櫳  
旬五竟無返萬歲遂成空形變暖行雲情感鬱回風  
良非服理人何由遣無窮

朝哭

脉脉星欲没悄悄雞既鳴皚皚霜塗庭閃閃月耀楹



三淵集  
婢來召我去我睡未甚醒踽踽至西廂而無我同生  
虛衾覆一魂深帷隔前形憶昔喜晨讀素書今無聲  
憶昔喜夜飲夕酒徒自清燈燭吐如月果肴列若星  
驚吁爾焉在進退失生平神掉難克歛涕淫易爲盈  
高堂在載寢吞泣乃下庭

感懷

冬雪爲春水玄池鏡色清嘖嘖樓東草今年已復生

哭弟

昌立

八哀

大塊邈茫茫忽然爾爲人旣來若有爲天畀未始貧  
瑤林迥擢標玉雪內凝神奇志獨不羣邁邁至雲旻

蘭臯縱逸駕秣馬待天晨嗚呼萬歲願竟止十年身

其二

啣啣高堂上爺孃病四年阿妹去如昨積哀黔陽天  
天心竟不悔汝豈慈愛捐一者尚可言理譬今何以  
任其晝夜哭不敢仰而視謂爾厭斯世何獨忍乎此

其三

爾婚如昨夕爾逝何怱怱胡令窈窕人棄捐委霜風  
低徊海上別琴瑟感寒空蓬蘿遂焉絕痛矣顏方紅  
哀哀黃鵠寡胡爲我家中

其四



三淵集  
子子復歌歌出入但廓然瞿然顧我後零落忽我前  
蔚蔚六青軒曾是聯我肩風霜入深園弱枝有摧顛  
相代豈無願已矣奈何天

庭有六樹冬青數與馬  
行相儷故嘗以名軒

其五

詩亡自聖言千古遂茫茫何況守海國榛路久已荒  
小知信多怪大惑固迷方繁哇久余歎頡頏爾在傍  
遵川濬千注吹谷鼓一陽試爲朱絃唱玉珮何鏘鏘  
惟天闕正聲宜爾遙云亡惻惻永長暮天籟咽白楊

其六

自我有歌詠靡不與汝論精言每纚纚商確造天根

相說輒獻笑以茲解朝昏天倫得郢質斯樂洽荒墳  
庶令百代人知有我季昆嗚呼不可知存沒萬事翻  
濡翰向何人我歌自此吞

其七

覽爾海上作發篇盡老蒼風格信崢嶸忼慨一何長  
煙臺放悲歌海堂駐羽觴歸來道魚龍壯情久激昂  
于今我知之世促意已忙的爍明月珠身死畱夜光  
收來入我室惜哉不盈箱

其八

屹屹我樓側東齋起新土問爾意何勤云是六藝圃



三淵集  
朋來苑如茅實以汝爲王團欒雖百年振耀庶千古  
成毀理太遽有散豈復聚空簾映西月暗牖洒北雨  
駸駸春草時哀緒裊萬縷但看路人泣母問余肝腑

出郭

出郭始何見青青水芹草采采我未暇驅馬放周道  
王畿信百里民麗久相保鳴牛上南畝春麥啓秋稻  
思遠非良圖飽食獨爲寶大車祗自塵母以憂自搗  
時有騷  
繹故云

北斗川望江

馬首澄江去溶溶見半流沙圓爲曲岸山斷復長洲

風色商帆落波文渚鳥浮託言紅日暮真愧未優遊

栗寺悵返

寫哀待佳境騎馬我有求栗寺喜人指嵐翠赴我眸  
介然小蹊盡登來暫夷猶人天黯春陰鐘磬悶藪幽  
晝闋細泉涌山高遠江浮興會非外助悲緒故內抽  
薄言袂已投老僧莫我畱春蕪被下逕又復出林愁  
山上有小屋與村邈絕問是士人所棲

獨往越平林矯首暫馳神有室若燕巢何時寄嶙峋  
迢迢雞犬影高出野馬塵誠有所好存取笑山下人  
霞意我有契厭喧亦天真自此三淵子遙與爾爲隣



夕望愴懷

夕望夫何遠遊魂似可求  
松平衆陰厚雲拆數星流  
誠有幽明者其來寤寐不  
暗收無限淚回向枕中謀  
哭返

來無一笑握去有獨號哭  
百年長謂兩相可今日伊  
阻誰厚薄試看斑斑草怒  
生清明寒食中金臺雨垂  
自北雲栗林鳥吟從東風  
紛綸相感物皆然胡獨幽  
明路不通如乳綠酒昨委  
地是在雍門千古桐

大麥行

大麥青青小麥同清明雨  
後春土濃村村視日牛得

牽路人稀少我自東有田  
萁萁太華峭誰道山人愛  
明農朝憂暮哭負杏花北  
斗川邊面發紅

登尹氏亭

王灘綠水流泱泱未至漢  
湖而回翔灘西湖北純是  
野廣陵行人津路長乃有  
高亭迥臨水側岸歆石長  
風起華嶽三峰不期來却  
立青天竦然峙水落與我  
嗟蒼翠具在是未可斂一  
望居然勢萬里馬渡王灘  
屢此經今日登亭乃清明  
清湖鏡面遠帆來翠松苔  
皮好鳥鳴鳥鳴嚶嚶復細  
草向來歌鐘極勝情東山  
風流非所擬金谷驕奢豈  
無評真成道傍惡木陰誰



三淵集  
歎庭中旅葵生不如綠灣上爲爾一濯纓猶然感慨  
切興替一曲長歌曲池平

與士敬聯枕話別

弱念清明後嗟君又莫留深更淹履舄長淚泫衾裯  
鳧鴈分天別龍蛇近海憂春風徒自迅梅柳暗西洲  
寄士興  
自君之去屢春風漢陽十年花且紅握君前書怨君  
欺北風雨雪夢徒通折麻樹萱捻虛設何如一會在  
未翁江湖綠水漬蘭臯君看百鳥萃蘋中

其二

我袖泫然五年濕一妹一弟委原隰是日東風髮亦  
華去日已矣來日急把臂相會一面艱三池樂事嗟  
何及清明出郭還入來眼中西山雪余泣

其三

瀉水東西不一流浮雲南北莫之由上都煙火久平  
樂我生之後鬱百憂小白山高士敬歸百口安危在  
茅洲吞聲躑躅今一別何以能爲後會謀

三月三日

嘉月嘉辰不愆名濯濯雨過漢西城日出天東麗新  
霽淑風清雲使人輕小苑柔草錦紋舒九街芳樹遊



三淵集  
絲縈此時愁哭未相當妙物滿眼增不平未知歌酒  
讓于誰北里少年春臺行

春夕愴懷

朝向終南把淚迴數家牆側杏花開縱捐春物繁如  
錦却有西廂片月來

過佛巖有感

春氣滿北里出門亦復然未遠桃李蹊仍逢澗花燃  
青松覆藤藿白石抱芊眠晴霞華頂來暉彩我馬前  
宛然過佛巖山鳥鳴可憐宿遊倘可續斯路漸松川  
吹笙在何處芳物獨三年流淚下綠水慷慨我其旋

紅杏吟示夜會諸子

滌滌間何闊今夜忽復得俞子我嘉隣相過暫同席  
洪生下馬爲我宿崔君到時織月落月落星森夜氣  
變百花春暮照芳甸此家紅杏未寂寞戶外燈前爛  
如霰莫言花開每相似去年落花千年委人生有甚  
焉慷慨無所比直置有死生散合何時已哀吾淚盡  
朝露葵別君歌動江漢萍不知今夜作何夜握手難  
均哀樂情桃花春水來滾滾上峽扁舟遠帆開悠哉  
不可繫且有此低徊洛陽對門可奈何小齋草沒君  
其哀



送俞仲强 命健 昆季之清風

好人初來時我樓始翼然來倚亦何言  
婉婉卜隣緣雙鷺暮過墻鳴我池中蓮  
良夜月散華譚話繚紫煙淡味寄通井  
疎襟越分川有時懶蹤履良謂有百年  
一為同聲哭未繫長往船搖裔碧樓薄  
蕩漾丹丘沿春浪豈歇時渚花亦云妍  
送君渺自崖閉門私自憐

其二

活活江漢水春魚曝沙渚我有長長綸  
不知投何處方舟采杜若願子且容與  
所乏樓上酒徒有別淚滑潭潭竹嶺北  
君子樂安所清琴莫疏節好歌可屢舉

隨時察春華是我平生語

傷二毛

迅商無青草繁霜悉玄林盛謝理固然  
紛披誰克禁獨有倍時至賢達每驚心  
自從潘郎來吾衰早已深春風池上沐  
有髮皓映簪此物奚所從似因積衰侵  
既來永難變徒為淚沾衿丹砂稱大藥  
未信化黃金嗟爾美門子欺我崑山岑

豫章行

山有豫章木崔嵬拂青天上承三足鳥  
下蟠萬仞泉奇禽東枝棲靈鳥西條攀  
霽雲護其頂甘露潤其身



翠葉茁鳳翼黃腸蘊龍文昂藏豐尺抱偃蹇度歲年  
大車一朝來截我千金根願享丹青樂甘心柯葉捐  
搖曳入中國顛倒越山川經歷萬餘里路人謂我賢  
本擬洛陽樑終爲盧門椽得託一何鄙惆悵竊自憐  
早知我如此枯死窮山巔

猛虎行

猛虎稱至仁斯言何以生俯視歲暮人傷彼按劍情  
傍能行仁義莫若不下庭論交指金石焉知後不爭  
荼梁生田中遙望蔚青青蘭蕭九畹內同傷九月霜  
惻惻我耳聾彷徨安所征且復日飲酒高吟猛虎行

黃雀行

局局嘆何物黃雀聚藩籬曠然六合內圓方詎周知  
啁啾盈庭牖愁我桑榆時舍旃遠方遊駕我四牡馳  
荆林闢百舌蜀樹繁子規獨有雲際鶴含咲下來遲

堂上行

青青堂上葵誰鋤野中蕪飄飄風上花吾知去根株  
衆不可戶說悠悠却長吁鴻荒其緬矣頽波互相踰  
朝見聯袂子薄暮不回車英風激縫掖素塵淹詩書  
滔滔來往是紛吾有端居丈夫處其厚焉爲工言儒

杜鵑行



三淵集  
杜鵑字蜀魄蜀中之哀禽不自道冤恨但有平生音  
濯錦江流春始漾女郎祠前夜自吟夜吟何磔磔西  
天苦雲深山高草沒臣妾空飛去萬樹非故宮回翔  
躑躅何枝安平仲綠今檀花紅漫爲百鳥送張翅度  
東風東風萬里入蒼霞忽逢精衛於若木之朝華蓬  
山八桂摧巨海涵三光蒼茫炎帝時欲問不能詳淚  
如紫波翻羽如枯蓬飛萬世一回顧心是而身非我  
行見之却沾衣念此死生變化多然疑但使人生盡  
如此誰恨黃泉路玄微

短歌行

背春望秋節氣道綠樹日茂黃鸝留酒不飲鷓鴣  
來百年之命未悠悠東有扶桑西濛汜我思僊山日  
白頭終遠兄弟泉路夔安得招來洛誦樓

其二

北山有李南山桃昨日花盛今日無我非金石住其  
間安能意氣久敷腴菁華將竭褰余裳夜夜思古淚  
自濡以名爲貌可長年嗟嗟吾誰與之俱

其三

金石溲然扣始鳴百事存人有污隆古稱白雪今折  
楊長夜漫漫足繁風胡笳燕筑鳴赤縣安知吾道不



三淵集  
在東萬古千秋淚水清吾令華岳增青蔥

燈夕感吟

在天爲嘉節在人無懼日清明上巳更燈夕他家歌  
笑我每失庭前奇樹小青桐哭罷鳥啼紅藥東其人  
不在坐自吟今之隱几非昔心

耳聾

志士意氣何時豪兩耳日聾鳴嘈嘈嘈不絕心已  
亂有時自驚聞陶匏平生洛樓朱夏中不復遠招長  
松風獨可深居靜不起客來千叫但任爾啾啾唧唧  
於我何亦不必脫巾洗耳頽川水

仲氏以 王命往謁尤齋憑有私乞臨行抒哀

以贈

我兄自公退征駒在中門 王命越原隰柔腸可斷  
魂高堂興歎愾虛廂積煩寃是日紫荆花夫何發幽  
垣綠葉與紫莖雲雨浩翻翻相送在其畔相泣亦有  
言緬矣六轡柔去來多晨昏皤皤華陽叟可慰白楊

原積一作結  
雲一作山

黔山端午愴懷

橫舟漢廣涕漣洏積歲猶然朝暮悲風雨天中沉赤  
日松梧原上止黃鸝千門結艾爲人易五色連絲續



命遲不見楊山蕉荔地生哀死怨合如茲

送南相九萬赴燕

我東何多事相國重行行將萬里飛蓋在炎程  
念彼不停軌憫然居者情依遲拜龍闕迢遞向鳳城  
夕餐已添冰晨旌每凌星吸醋未爲酸辛艱悉難名  
安危夙所佩忠信利斯征神夷路無險憂重身固輕  
遙歸仲山甫王心賴公寧

其二

五月龍火貞雲雷正塞天君子舍鼎鼐信邁未息肩  
舟楫任一身經綸寄遠鞭駢駢肅時命勞汗洒山川

遼東鉅野間望海危譙邊鯨波吼濁潦中多不測淵  
投金抵幽壑誰能見其填珍重山嶽軀百爾善周旋

其三

西山有柔薇北海表孤竹清風洒在茲崇廟氣甚肅  
灤河不可唾源清宜澍酌下有玉帛路彭彭走毳幕  
古人穢周粟哀今但感激

其四

燕家黃金臺初爲報讐開臺高接青雲金賤奮龍媒  
壯圖逮金丸豪歌易水哀成敗不必詳餘烈動風雷  
去去憂憤際危涕迸草萊



秦王昔築城所防意如此蒼蒼大漠氣今不礙萬里  
萬古局鏑固衣冠此中跪重陰霾六龍玄雲方鱗起  
漠漠后土泥大運固亦爾東藩豈偏弊四海無烈士  
撫摩北平石安得射虎子

其五

一絲亭

伯父谷雲先生亭名

德津滄波瀏且清高亭何以一絲名夢中煙雨本蒼  
茫祇今人卧一絲亭桐江釣絲脩幾尺能令伊時萬  
乘輕釣魚不得得不賣方平頗得嚴陵情青青竹竿  
委虛舟相忘江湖濯長纓東洄西何不可碧樓丹

丘通月明我來一宿遙心生

題洪生世泰日本所得獨釣寒江雪圖

滄浪子心愛滄浪釣魚翁粉圖白雪雪漫空濛濛浮  
浮衆山同谷沒徑沉通萬頃漁舟泱泱冰澌中檜楫  
蘭橈白皓膠其釣如何坐迢迢行人不來魚鳥寒白  
雪滿眼終日飄伊昔詩人直漫吟畫者可謂能苦心  
日本滄瀛越來遠知君不重橐中金富士山巔四時  
雪琵琶湖水千丈深舟中往往笑披拂舟下鯨龍鬱  
飛沉西塞東津咫尺闊浩蕩歲暮非古今我亦不淺  
箬蓑懷遲君抱圖向余開高高一挂北山樓吾豈憂



六月炎蒸如火哉滄浪洪世泰自號

出郭

出郭翩翩冥冥輪蹄莫我先據鞍天凜寒霜露滑長鞭  
澹澹東方星飛鴈過瑤躔鏗鏗南遊響夕宿乃吳天  
晨雲方萬里遊子揭竹川神轡任揮霍不知何時旋

哭亡弟墓

蕭蕭栗北原霜果隕道上果隕尚可拾葉落徒飄颺  
慄慄若遠行撫墳告東向三人實同行二子翼我杖  
山高水湯湯無爾凌雲唱長哀應日携薄輿何由壯

屈雲村

馬病車踰嶺日暮為後旅獨立野颺急回首冥雲去  
莽莽靡可程眄眄以久佇攀林至別村矐然白首女  
一飯秣米香新月皎并杵木落馬翹陸床寒蟲感序  
迥江殷山趾時時響乃舉秋聲難殫數夜思爰多緒  
滅火誦楚辭倚籬念玄渚

曉霧

夙余問星河主人言無雞起來渺所躡凌兢下脩堤  
巨霧悶晨物霜液兼淒淒澎澎是何物江水曳素霓  
寒狷吠江東宿鴈翻江西行吟此江遠濫觴蓬山倪  
蜿蜒幾湍瀨吾行默相携神暉韜彌章亮節激難低



三淵集  
杳杳以東行駑馬見日嘶

昭陽亭

君不見昭陽亭子奇大江之源俯在斯白巖明波千  
載魚紅壁沙版古人詩悲吟吾祖翫江春不見桃花  
杏花飛江流悠邁野色寒霜風捲我登樓衣百年往  
事已翳如莽莽貊國誰遠思

西泉月夕

清平有奇岫慶雲與芙蓉雲歸芙蓉峰月臨香爐峰  
雲月我何宿濺濺古時水山木鬱穆穆女蘿屢枯死  
瑤華山下飄石蘭露上委松杉與誰玩夜風其吹矣

隄側整塵衿曖曖增想似

僊洞

清蟬吸湛露靈蛻委高林玄鶴矯雲表一舉遺飛音  
峩峩乃如人精爽逝不沉碑版旣森朗臺庵故嶽岑  
西躋寤僊洞北溯揭石龕循蹟似易掇存期竟誰尋  
松危石磊砢林密澗淋泠蒼葛扇荒基絳葉委稠陰  
翔佻遂不倦永獲過江心清泠苟無恡余有未濯襟  
是求寒言有意茲道何以任終愧菲薄甚倚石涕淫淫

出山

山雨罷如洗清雲妙爽節雲確知水急萬壑增清冽



三游集  
遊人整歸袂戀勝徒虛說維山芙蓉秀維水龍潭潔  
橋行出泓崢悵恨兼搖悅延佇及塔嶺天路饒曲折  
山僧紛相送此如虎溪別仰折九松枝黃葉滿一禪

遇風

夫何下山時發發回颺亂倏吸非一勢應自萬穴散  
長江感吹萬水物駭鳧鶴奔揚及危磴驚滂巨絕岸  
逶迤彼素渚初路嘆清晏天暉莽以變曾是未申朝  
憑心喟歷茲竦馬頓長絆誰使去來煩閱此靜喧換  
飛來逐風葉滾滾下清漢嗟我傍江心如繫慶雲畔

五歲童子遺基

維東靈淑園佳者列如碁我行未其半投足俾忘饑  
慶雲朝濯髮華陰暮振衣山高澗何濬日落雲彌馳  
清源下昭陽宛轉此靈基餘響感余策延首溯清暉  
莽莽欲詢古道荒漁樵稀霜崖惟落葉何處問柔薇

伴睡菴

華山深逶迤雲生幾處所日沒餘輝存崢嶸訪且去  
歸鳥拂驚湍鳴馬遶幽楚旣至爲微月孤禪歇琅鼓  
默默麻衣徒菴名亦云古

暮入龍華

蘿月滿空峽是吾華山谷山光暖冲漠夜氣分喬木



三淵集  
來時赴叢雀坐後曳柴犢荒蹊寺東橋新茅瀼西屋  
歸休我何晚萬感縈今宿舍茲躊躇意豈以此地薄  
聊且步前圍指點覽有無寒泉炯町疇歷亂滯穗餘  
嚴霜凡幾降望星語農夫羞問玉女潭三稔豆田蕪

石泉寺

經歷石泉寺逍遙下西南巖泉百餘尺靈液飛松杉  
緣流行濯纓前有清泠潭潭名誰所興宿昔鑑我心  
踟躕就盤石長嘯憶春林俛仰景氣變寥廓見崖岑  
日晚起西風颼颼振衣衿

石泉寺感懷

吾人到石泉復携南來子數往今三霜楓樹向我紫  
高登紫雲臺細聆玉乳水山川每在而我懷感太始  
悠悠勞俯仰孤倚暮將徙窺淵忸二毛撫松美真髓  
千尋葛漠漠卒歲石齒齒壑深舟豈存谷虛神不死  
王喬不我速荒靄滑幽履靈溪倘可溯糗此晚菊菜

其二

矍矍晨飛雀翔自野田來山深廓何求喑喋澗底苔  
纖條出泚泚身微若浮埃有營苦界窄無適樂天恢  
幽人靜有見外物緬西臺澹澹白雲往丹丘此可媒  
靈泉



三游集  
天下嘗泉水未至鳴城山誰謂帝臺漿不遠在此間  
衆夫所希見山僧獨嗟嘆高槽承靈液清澍激細湍  
涓涓來不息千載未始乾挹彼漱我腸泠泠徹心寒  
人倘欲神僊因此生羽翰

遇雨

密雲朝入谷零雨沾高樹川水聲自急潺湲湓豐注  
大麓黥且黑遊者眩天路請看爐中煙散爲山上霧  
變化在斯須回薄不可數

月夜

神霞啓明月月出松風吹微星澹在西行陰無停機

羣品受冲素餘者混翠微采菊起彷徨金波露沾滋  
苔竇耿濕澗雲嶠合清霏容光獨奚宜蓮宇半掩扉  
灑氣不盈掬猶自潤我衣神超象締近坐久鐘呬稀  
誰爲不寐僧吾與分清輝

白菊

白菊誰同色盈樓霜月輝山高石梁絕終是醉人稀  
石泉寺待月

冉冉月生未人看西嶺白松風如有催蕭瑟澗中石  
其二

玉乳鳴泉墜鏘鏘響有神昭回中夜氣持勸蔭松人



下山

彼月明如昨人今野宿寒盈虧非所惜嘆此下山看

別士敬兼寄士興

山月楓林杪水月蘆之漪搖曳素練輝浩蕩破鏡期  
破鏡圓珪各自知手持瑤華向盈虧正爾延脰夕却  
又秋風吹秋風吹征馬嘶輾轉不寐晨月垂

洛誦樓小飲答士敬

霜竿爲樽涿畱君凍飲之鐘鳴寧視夜言永竟成詩

其二

青雲起池上伯也已先驅寒夜論龍蠖江湖意有無

其三

溪東惟此夜樽酒隔楓林風瀨晨應甚增君病鶴吟

其四

分夜衾稠徙于茲感一觴深朋與宜弟天地半參商

楓溪朝起

寒雨淒淒十月交雨來旣霽風蕭蕭清風池閣與子  
語薄暮通夜至晨朝西山鳥啼林色古東方日出池  
面搖庭畔高檜復茂松落葉無數向軒飄徘徊感歎  
黃菊衰朝醒未析思酒瓢

楓溪遇雪



三淵集  
山氣晚如何無聲下微霰寥寥芳酒登蕭酒此相見

其二

短景歸還懶堪歌桂樹詞開軒第一雪牽率坐三池

其三

君看白雪暉緬擬茅山鶴默默我傾神瑤林亞虛壑

其四

燈前何瀏亮冰澗迸松風深心語風雅歲暮葯房中

衆妙軒

李進士奎  
明軒名

君家三面豁不盡是青山古木雲嵐接平臯鳥雀閒  
簾垂惟白室門掩卽玄關獨有滄浪子相看暮未還

與洪世泰聯枕

明月來高檜長廊夜坐深屏風輞川畫擁雪郢中吟  
竹葉吹華酌梅花望遠林今年亦超忽珍重我知音

喜洪世泰來宿與李瑞卿

奎明

對酒同賦

扣門夜未半君從何家來九衢狹巷人如雲出門山  
高水潏潏歲暮君且鱸鮓潛黃鵠一去何能廻惜君  
之袂願須臾南隣佳朋與之偕三人於此燈下坐燈  
明爛爛翠帷開高樓欲飄沆瀣雪半嶺已挂崢嶸月  
一榮一辱古人有有才如君竟奇絕天驥側側朱蹄  
踈豫章鬱鬱霜根裂凍飲三杯擊瓦壺此歌有意廣



柳車洛陽賢豪其誰人夜夜三諷龍門書男兒結交  
金不足終是悠悠棄路衢

病夜悼懷

玄夜閉脩廊遥遥二更餘清燈獨在左人迹久已疎  
輾轉枕上叫肝腸默相於慟甚一身疾神去五蘊虛  
忽忽却不省謂伊在平居不知為誰故零淚屢沾裾  
沾裾心始驚痛毒實難除斯心亦須更嗒焉復如初  
夢覺特未定天淵渺鳥魚為問逝者心于今定何如

雪後

明月照庭宇素雪以為藉暉素皎在茲惜哉共誰把

清風起悽愴我淚映襟瀉多謝居權子何以徂斯夜

清城府院君

金公錫胄 挽代家君

名門間氣篤靈休文武周邦吉甫儔寵擢非關依日  
月忠貞元自襲箕裘扶持國步苞桑固掃盪天衢積  
稜收鐘鼎旂常從古有獨看功烈耀千秋

其二

邦家艱大父無津神理胡然奪若人鉅谷陰林思虎  
豹中天畫閣仰麒麟冰髯送紉君王淚玄甲成山壯  
士蟬最是五湖舟未放角巾軒檻鎖煙濱

其三



三浦集  
不盡危途事可驚同寅相勉二人貞  
陂平實藉回天力吁咈終均捧日誠  
鳴鳥憂深君爽誥騎箕痛結傳巖征  
北風玄武迷霜霰孤坐籌司淚墮纓

伐冰歌

君不見國之大事在藏冰用之元祀頒  
在位每年江漢二之日水滂不流水大  
至于是斬冰萬夫出斲之如山江上置  
江上兩冰庫相望十許里碎訇散斧斤  
皓膠雪雲起深波爲蕩汨如裂半江腹  
蛟龍走逸畏相及水神愁懼魚鱗屋削  
鐵獻玉官長臨堆著一處高百尋屢燹  
天回沆瀣氣合沓地畜玄冥陰陽春羔  
韭順時發夏陰冬陽此以節奈何今年  
冬日暖愁有司周時幽風魯春秋此理  
紛糾祗今疑吾家老兄職斬冰與論天  
時起嗟咨

除日道感

露津無行舟長冰白如石鱗鱗絙龍山  
皓皓彌銅雀半渡舍危慄人馬共躑躅  
默哂小狐涉沉念巨魚寂流波放何時  
鬱鬱萬折綠玄穹晚氣邃北風度寥廓  
悠悠千愁餘今歲寄一夕行盡已如馳  
奚須晚嘆息高人卧曠原降馬問大易

寒食七思

乙丑



我所思今思阿爺今春寒食曷以過駟馬高蓋洛陽  
道感眉歸家哭滿家思翁之歌悲若何山中遙望鬢  
欲華花開滿枝玉流洞誰勸美酒使顏酡

其二

我所思今思阿孃十年嬰疾苦在床生我七人鳳養  
雛文理纔就有殞亡青精細飯杏酪粥小婢裹出兩  
白楊雞鳴倚櫺號至今遺稚瞳瞳坐其傍

其三

我所思今思黔陽其人非生久已亡年年寒食江漢  
綠每於中流涕漲裳到處春風今復爾汝魂何歸我

魂翔山高野闊望東州三星羔鴈昔此鄉

其四

我所思今思栗北嗟嗟我季此寒食去年酒滴淚落  
處應添幽草滿原碧東來採藥身半朽遙令一杯更  
寂寞紫雲臺上一放神風吹南雲莫相隔

其五

我所思今思兩兄聯翩衣馬仕王城朝回入室意如  
何樂中深憂每若驚春陰在天麗日稀泥路漠漠恐  
難平鷹巖白雲人少猜願奉家翁風珮清

其六



三淵集  
我所思今思兩弟三人憒憒命若綴身將藥餌問同  
氣念凋琴書耀一世別來幾日阻瘦容春心春夢兩  
無際鴿原紙錢爾誰往側身佇貽面生涕

其七

我所思今思茅山百爾所思毒心肝宿昔論心兩人  
已存沒今在恍惚間魚龍海國風樹驚池臺城西酒  
肉乾巖居莫得聲息真山路嶽嶽海路漫

東谷尋瀑兼尋花信

山居日養恬飯後生幽心三子已揚策步隨東向禽  
路屈入晻靄崖回遞嶮嶽石梁瑩餘雪雲梯潤新林

周回觀金潭蘋莎青欲深雖無花似繡辛夷可安簪  
芳蕤垂半播暢樂佇後尋朝霞漾人影牽率逗清潄  
采采石間髓永懷駐春陰偶於石間采得雲  
母蓋道其真也

石泉寺夜雨

簷鈴混石瀨竟夜聲無已松牕紅旭來又別清溪水

其二

泉壑喧蘭若干花奮翠微疲人深一卧靜失春風機  
雨後望瀑叫奇

萬壑喧相闕深房類在船起望南峰瀑何其壯倍前

其二



三淵集  
竹箭勢浸急松林聲不乾相承下潭滴更欲就西看

其三

白雨正的驟飛虹空裏生鐘鳴休暝色通夜見鳴城  
連有淫雨坐念瓦壞慨然興嘆

風雨如相攬終宵瓦解憂隨分白茅室蕭然吾可休

二子觀瀑悵莫之從

臺西素雲瀑今雨幾尋垂煩君傳若畫無使我神馳  
十二日風日甚恬崔李與姜也愛其景美出遊  
寺南潭曲病余未之偕望于樓上氤氳空翠間  
見其列坐揮毫若一障畫洞僊者聊飛一詠

僧就東崖汲遊人復水南方同折翅鶴欹立望松楠

其二

山光美非一春服妙成三明滅柔毫舉微波漾下潭

其三

魚鳥金潭曲春雲目下飛終成表獨立所未詠而歸

西臺遣興

雲山雨三日霽晏清暉來奮我負床身一舉矯西臺  
如挹赤松袂何美謝眺才曾遊亦屢矣茲賞蓋優哉  
景美若天降興驟非吾栽松風數聲到遠瀑石門雷  
林疎透碧潭霞蒸曜紫苔新花日下盛瀾漫疊蓓蕾



三淵集  
此物昨所稀遊蜂亦徘徊未怪會心處諸君念金壘  
澹泊我偏甚遇樂只忘迴却顧山外野愈喜遠風埃

春夜

春月生晴夜華光圍遠林東源遙隱見斟酌露花深

其二

濯濯清溪月何須丈室燈春衣滿襟白持以託高僧

其三

病欲焚吾筆春深若有牽今宵困花月搖動石間眠  
煮杜花

春芳爾居初好事投煙火舉筋望高林餘花畱幾朵

其二

啜花飲素泉晚飯樓上歇不復有一爲松杉坐生月

漁獵未獲

駭網魚潛黑欺鷹雉子斑飛沉了無得猶不廢看山

自石泉還龍華流憇九疊屏上

春鳥聯羣出樹飛山僧送客拈花歸南峰瀑布歸迢  
遞猶恐餘波拂我衣

其二

十日回筇春盡還與君申憇此松間摩挲老幹心千  
古非不煙花滿四山



望金剛山

數見物不鮮屢度情易疲夫何此楓岳令我三來爲  
塵區積百憂出門偶及茲自下斷髮嶺屢叱我馬遲  
新院暫流憇午飯白沙湄杏花照綠野瑤草被漣漪  
於焉已堪棲進路轉懷奇高飈塞晚靄半山出雲馳  
崢嶸積玉標勢將逐風歆臨當九渡水氣狂不自持

入長安寺

望寺石上坐心樂漱前川方將且踟躕聊復此周旋  
輕輿古道出塵鞅棄水邊不知松檜陰身已近真僊  
長橋架丹壑此水萬瀑連炯晃彩殿大離列白磔圓

矯首望積翠滿眸悉如前婉婉奇麗物夢爾曾幾年  
靈源片雲歸長影倒清漣日暮更步橋緬矣區中緣

過鳴淵

一宿起能早神宇恬且閒肅我同遊子子興視青山  
朝暎蔚舒霞金碧滿長安覽周吟東濱邈迤入花間  
一路盡蓓潤春衣殊不乾好鳥隱芳杜嚶鳴激噴吮  
竹密百川翳石出諸菴環新龕浮水月少歇觀潺湲  
清輝溢眇眇催我渡玄濟危棧俯陰巒知是鯢桓蟠  
一笑過飄然跬步改心顏

望高臺



三淵集  
天險不可升高臺薄層旻攀援由鐵鎖裊裊以致身  
長風萬仞積降望生蒼塵白日漏光急雲影走如輪  
神搖久乃凝目眩轉能醒萬象歸孤峭千念委太清  
悲生人世小笑發身軀輕

新羅太子遺城

靈山多所蘊冥探苦無際足及靈輿宅神投應真契  
從容方未央忽此感睥睨蒼莽雞林人霸氣昔來滯  
顛木有由葉宗城非自衛蜀謀背壕憤齊橫就島計  
廣傷王噐覆偏圖一隅閉想其操鍾初起躬士血涕  
將無萬夫地倏起帶天勢轉石玉山雷雲物入包係

經營今可見事遠終昧翳蘋糊反故隍素雉宛半制  
靈溪不復池寂寞以清逝松林氣屈強老藤絡蒼荔  
千年鳴鶴集僊侶惋興替朝從望高道歷時山雨細  
永歌危石下鬱然雲沾袂

楊蓬萊大字

奇哉蓬萊老落筆萬瀑中巨鏡入盤石勁然氣甚雄  
流水浸將半繞字走驚濤偪側雷雨淵變矯通遊龍  
竦杖挹奇韻斯人倘僊翁

金剛臺

飛來雙青鶴飛去故巢落崢嶸百餘年遊子仰苔壁



三淵集  
桂樹幾株遷玉乳他巖滴靈源窈窕處復聞出奇翮  
天晴傍僧飛盤舞小松蘿隱見脊誰測靈壽好已多  
但問背上翁真興竟如何浮遊凌海月出入擁彩霞  
今我來躑躅足繭臺下過

普德窟

大士昔浣紗巖在迹不迷楊水渺千春時禽石上帝  
更問華人沉溯洄羣龍溪樂極易忘死意會真無睽  
循岸將距源抱林屢問蹊目驚石鷹側飛閣駕風霓  
竅空蘊金竇礪硤露雲梯鐵鎖拖銅柱橫豎力與齊  
勢危洞不測功詭入無倪莫詰鑿虛意沉吟撫青藜  
仰之妙一望登之詎久棲

摩訶衍

言觀曇無竭行息摩訶衍林閒有靜柯溪平少驚濺  
窈窕境自別真興不可選蒼蠅對我蹲青鴿晝稀轉  
已有冥樓僧客至湛相見無言能感余暫欲忽纓弁  
蕭條害馬去滅沒諸有遣山牕風以開衆香若披面  
信宿度晴雨心依悵身轉將去捫老木此桂誠可戀

九龍淵

初淵瑩開鏡水石均清圓岸危乏樛木何由恣蕩沿



其二

二淵懸瓢似瀑流喧吐吞誰知呀然小迴洞搏桑根

其三

三淵蕩瀟瀟黛綠徹中深神奇不可狎默躲遙崖臨

其四

四淵勢舒緩聲色稍愉人凌兢借下瀨半涉回頭頻

其五

五淵急回軋南岸側成釜馳波迭後先赴隘徘徊舞

其六

六淵美如璧清涵石紋粹竦髮注眸深高雲正泛翠

其七

七淵幅圓小寂寥承清漉河車三鼓輪轉入魚鱗屋

其八

八淵淺堪漱潛龍易出身日靜玩澹瀨真爲遭睡人

其九

九淵落山外繙引千尋湍連聲日夜搗神物中自安

九龍淵歌

水落毘盧峰錡錡萬仞壑東兼九井峰下溪流向海  
門石壁隘西來五十有三佛夜半驅龍以金策龍失  
宅叫其子雲亦片片與龍徙淪洞百丈龍實都環以



挿天雲錦壁九淵上下白石素明鏡為底水銀滴鼓  
鬢磨鬣石痕古龍之為變見佛力初淵觀者慄未逼  
及至終淵髮皆蕭髮森森步躩躩松林倚身足底瀑  
冥游諸僧歌霽日爾忘風雷閃不測滄瀛苦闊巖竇  
小淵雲為雨沛東國誰知淵龍非海龍誰知九淵非  
一宅

百塔洞

經險九龍淵樂餘神猶奔遺想在百塔往踐高僧言  
飄飄金策先颯纒蘿衣翻氤氲登一路屈折訪渾元  
翠壁多瑩秀丹嶂互飛騫寺遠棧梯斷莓莓怪石

缺

厲澗隨飲鹿攬蔓擬騰猿屣滑柔林蕙帶掣老樹根  
屢坐非息疲多愛玉溜喧披煙摘潛穎順風馥幽蓀  
采藥心無限高視白雲屯曜靈將半規每懷未窮源  
山霾雨將結嶺極雪猶繁終然諸景萃惡睹列塔存  
三車數歸一得魚笮可諛誘興興已暢遣有復奚論

登衆香城

朝霞衛一路路絕香城起冥游隨目朗竦體以高時  
折桂掃紫芬擧芳藉素髓寥廓正氣由端緒久在是  
團天積蒼蒼上下叅萬里將身混沆瀣不知氣表裏  
長嘯漱九陽神明溢皓齒至道淡不煩奚必廣成子



三淵集  
雲將倘相問曰我友太始

伽葉窟

携僧將索秘逾往涉幽昧捫蘿拂厭浥降壑貫駿隸  
神恬忘積疲境遞生新愛空青散輕綺清涓續鳴珮  
磴轉絳氣折風蘿舞肺肺靈窟棲淡泊幽龕寂相對  
邃然麋鹿寡守茲誰能每僧夏蘿壁頓佛影葑房晦  
環簷山影厚瓊峰皓以戴環奇竦物象清鬆秀天態  
晨登豈不峻半入高雲內振衣恐非余惝恍使心暖  
一身有升降妙物趁身在鳶高暢不闕魚淪悅無礙  
竟皆人外樂畢命吾無悔

須彌臺

摘花須窮百尺枝探珠須沒九重淵登山不深入妙  
境胡得焉我從圓通問邪徑云從若士與列僊朝登  
船菴北皓若重帷塞戍削崢嶸復卓犖聞名千峰皆  
積玉望望秀色去忘足捫斷幽蘿玄雪落蘭林婀娜  
閒自扇白日氤氳漫山栢清泠之水來一抱白塔自  
起非人造毘盧西轉永郎帖異氣盤紆積來早寥閔  
恍惚天地戶寂寞恬愉采真道徘徊欲起復不起更  
望瑤臺奇絕倒東皇膏澤青瑤流永郎氣息金光草  
吾將命此爲瑤圃吾將與君稱三老淡泊神明永相



三淵集  
保遂令白雲騰往求三青鳥雲亦不復來鳥入寥天  
渺義和倚峻嶒告余以忽忽玄熊食草走漣漣將欲  
歸來恫恍惚

蓬萊歌

蓬萊羣峰羅碧天世人強名萬二千往昔傳在渤海  
中何時移來渤海邊赤縣羣王輕五嶽願登此山爲  
神僊鯨翻颶作經幾載出門西來山翠然是何山高  
氣太清使我起疑鴻濛前長安谷口列栢森香爐峰  
前萬瀑深氤氲古道走瓊窟合沓穹林遞碧岑此是  
松喬出入門餐霞茹芝道不煩行掃白雲捫石髮九

淵蕩碧二花春嘈嘈天籟矯游龍翳翳菌桂醉幽人  
別有高明天逸臺歸來倚策重徘徊徘徊東望山滿  
眼一一乃見真蓬萊蓬萊復蓬萊刻削以崢嶸物類  
之所象竦峙或若驚隱隱煙雪的的羅星青靄倏忽  
永郎帖白玉錯落衆香城香城灑氣結繁霞一鶴高  
厲雲路賒因憶蓬萊落海時銀臺金闕坐來疑扶桑  
日紅波雪山衆岫復似驚波馳山高海闊變化通太  
一下顧增嗟咨人間何地擬此山天上何僊不往還  
我奈蓬萊三入何空花飄眼玄鬢斑畱亦不可久興  
亦不可闌臨當下黃塵更奈毘盧何天台四萬八千



三淵集  
丈輿公獨不負嗟哉登高能賦後人多我姑采藥於  
香城之陽阿

雨中靜意示敬明

弟昌緝

要和

佳雨宜靜者淋浪迸軒除雜響餘簷雀浮埃息巷車  
東牖生小白偃身委空虛潛知紅藥潤細竹青梧舒  
暫移愁哭情兀兀隣太初一睡思逾玄傍有猶龍書

待俞君四

命岳

夕映逗東浦朱霞照我袍  
邛友久不來俾我立江臯  
娟娟望三星月出皎已高  
餘輝近獨宿拊衾盈煩勞  
歸舫聊繫岸須及豆浦濤

放舟

映泫下東澨孤舟自茲放輕纜既颯纒大汎信歸向  
紛披碧絲藻進退蒼霞嶂篙師畏高旭鳴楫起亮唱  
搖入萬丈淶澆澆忽汪汪我身不自有我心與之漾  
誰謂方寸襟展以千里曠新亭緬然去回脰盈惆悵  
懷哉我信宿江月後難忘

漢湖少泊

弭棹漢湖間優游亦是戾洲渚饒應接睇目曠清霽  
朱霞漲桑柳江色少凝滯澆澆水蟲叱菽蒂林蠲嘒  
漂女履一石釣兒竿何細潭潭結綺閣臨水獨豐麗



三淵集  
江湖豈不大物意紛涯際扁舟可以下淺深吾何泥

驟雨

凍雨白山來沾我滿樓書卷書以清坐流目眇太虛  
縱知未終日且喜一颺疎幡幡屋上瓠焦卷可以舒  
長雷過古木遠接青郊鋤東南偏黯黑延跂及三隅  
雲龍意難準頽洞俯前除

七夕

啾啾雕陵鵲啞啞終南鳥叫上天濶千萬點九鳳羣  
飛蔽白榆騰駕渺相從隱當在中梁每年零雨世間  
疑飛樓月華今如霜月出橫天星入霞萬古此情誰

能詳

乞巧夜與洪世泰會于妙軒當月留話余適以  
故徑歸聊抒一悵

黃姑織女乘秋風故人十日一會同乍去乍來北山  
雲夜涼月出連初鐘庭柯寥落三匝烏銀渚徘徊兩  
飛龍爲君擊扇談古人萬代雖闊一言窮我忽徑歸  
月滿陌可見離合須史中

北山歌

北山秀極青天中白雲壅漢何逢逢山出雲雨積氣  
久根自道峰三角雄萎歲蔥蒨文物宅山下 聖人



三淵集  
深紫宮紫宮朱城象昭回長衢夾巷煙火通鳴鐘鼓  
瑟瑟岫響弱柳高槐連青松浮舟漢廣宛漾搖走馬  
陌上復昭曉陌上城隅日相見願接秀色千年遙君  
家妙軒洞開豁對山勝我高樓多宜爾先爲北山歌  
十四夜平臯獨立忽逢俞君四步月而歸  
鵝鳴墻月出落落東家檜平臯立超忽霜露遠山大  
暮景不可形商飈復涼籟倦樵與忙禽從容我游最  
長嘯立如忘村墟幻人外沙路有歸伴金波泛縞帶  
洪世泰來過

黃河迴莫測白壁出崑崙虹精燭天地漾彩萬里源

此寶罕人採君嘗造天根北風吹狹巷蒼茫卞氏門  
志士有蓬累由來淚沾巾往歲扶桑舸明朝赤水濱  
夜寒我杯深慰子被褐身

感興

北風感我耳何須入我帷天曛虛室白山寒到人稀  
玄雲先雪飄玉衡背日馳萬化貞夫一羣動默有歸  
如何慕類鳥夜永不安枝

其二

堅冰古硯上厚霜兩壁間今夕未出戶坐知四海寒  
一寒復一暑六龍何時閒思之恐惆悵置之滑疑端



三洲集  
童子默相對坐久遠鐘殘室闇莫呼燈冥昭我均觀

其三

王子卧山陰起來弄白雪搖曳剡中舟綠竹影披拂  
逸韻夙千載風雪每蕭瑟悵望我多愧歲暮將何悅  
北林夜犬吠瓊樹璨誰折哀生聞其戶窈窕亦吾匹

贈智霑上人

清夜懸燈語碧山誰知野縣異禪關朝來白雪迷空  
色萬樹如花何處還

白馬篇

白馬龍爲友上有邯鄲兒邯鄲重意氣善射且能騎

騎來將北征愈覺馬權奇纏星寶校鞍照日連環羈  
前見絡黃金後見曳青絲馳上代雲中瀏瀏度如飛  
邊沙行且靜胡騎匿已稀飛狐生北風白雪下霏霏  
軍中無夜警行獵示輕肥鳴弓磨笄山據鞍鴈門墜  
雙雕驚且墜左顧殪豹螭凌厲萬餘里復渡漳河歸  
歸拜武靈王獻以赤虎皮朝賜曼胡纓暮賜短後衣

詠金明國山水圖

石林峽軋山曲岬白雲層出何飄忽瀑水下來又有  
瀑隱隱如雷雜煙雪蓮潭豪筆乃如此十年一披叫  
奇絕細看了了遠近勢縈紆一氣如長葛長松茂陰



千尺蘿根抱幽石  
欹嵯峩中著兩叟  
霜毛皤松風颭  
颭衣袂波岸巾  
迢迢紫芝歌  
紫芝歌聲入杳冥  
但見水落騰盤渦  
末勢逶迤山脚斷  
凌流也有騎驢過  
清溪水闊左右瀉  
白波漲我東牖下  
滿堂觀者問空翠  
君但卷來不盈把

贈尹體元

以健

之任珍山

傲吏淳民得標枝  
野鹿如清琴月軒  
酌疎網玉溪魚  
紫綬苔塵近青山  
簡牒餘陽春今日  
動流脚趁行車

三淵集卷之二





